

10 March 2025

समे .18:15 Hrs

<><><><><><>

### Headlines

- मुख्मन्त्री उमर अब्दुल्ला होरें आखेआ ऐ जे गुलमर्ग फैशन शो च सरकार दी कोई भूमिका नेई ही। उनें उपमुख्मन्त्री होरें गी कठुआ जाने दी इजाजत नेई देने बारै सवाल बी पुच्छेआ।
- विधानसभा च अज्ज कठुआ जिले दे बिलावर च 3 आम नागरिकें दी हत्या ते गुलमर्ग च फैशन शो करोआए जाने गी लेइयै खूब डंड रौली मची। स्पीकर होरें दौनें मुद्दे पर चर्चा करने थमां मना कीता।
- सरकारै आखेआ ऐ जे 2019 बरे थमां लेइयै हूनै तगर जम्मू-कश्मीर च 10 ज्हार 516 करोड़ रपे दा निवेश होआ ऐ।
- विधानसभा च बजट पर आम चर्चा फही शुरू होई।
- ते मौसम विभाग नै पेशगोई कीती ऐ जे जम्मू-कश्मीर च हफ्ता भर बरखा आहला मौसम बने दा रौहगा।

<><><><><><>

### CM-Faishon Show

मुख्मन्त्री उमर अब्दुल्ला होरें अज्ज साफ कीता ऐ जे गुलमर्ग च फैशन शो करोआने च सरकार दी कोई भूमिका नेई ही। आकाशवाणी दे जम्मू संवाददाता मूजब उमर अब्दुल्ला होरें अज्ज असैम्बली च इस बारै जानकारी दिंदे होई दस्सेआ जे एहू इक प्राइवेट होटल च करोआया गेदा प्राइवेट आयोजन जेदा ना ते सरकार दा कोई रोल हा ते ना गै कुसै सरकारी ढांचे दा इस्तेमाल एहदे च कीता गेआ। उनें दस्सेआ जे प्रशासन गी आक्खी दित्ता गेआ ऐ जे ओहू इस बारै तफतीश करै जे आयोजकें एहदे च नियमें दी कुसै चाल्ली दी अनदिक्खी जां खलाफवर्जी ते नेही कीती।

उमर अब्दुल्ला होरें विषय दे नेता सुनील शर्मा होरें गी कठुआ भेजने दे फैसले पर बी सोआल पुट्टेआ जिस्सलै कि उपमुख्मन्त्री होरें गी उत्थे जाने दी इजाजत नेही दित्ती गेई। उनें आखेआ कि जेकर कठुआ च हालात इन्नै गै माड़े हे तां फही विपक्ष दे नेता गी गै उत्थे जाने दी इजाजत दित्ती गेई पर उपमुख्मन्त्री होरें गी नेही।

<><><><><><>

### LA-Uproarious Scenes

विधानसभा च अज्ज कठुआ जिले दे बिलावर च 3 आम नागरिकें दी हत्या ते गुलमर्ग च इक कथित असभ्य ते अश्लील फैशन शो करोआए जाने गी लेइयै खूब डंड रौली मची। आकाशवाणी दे जम्मू संवाददाता नै जानकारी दित्ती ऐ जे अज्ज बडुलै प्रश्नकाल शुरू होआ ता नेशनल कांफ्रेंस ते कांग्रेस दे विधायक बिलावर च 3 लोकें दी हत्या दे मामले पर बैहस करोआने दी मंग करदे होई उठी खड़ोते। स्पीकर होरें नेशनल कांफ्रेंस दे मिम्बरे गी सदन दी कार्रवाई च अड़चन नेही पाने दी बार-बार अपील कीती पर उन्दे ठकानें दे बावजूद बी ओहू नेही थमोए ते रौला पांदे होई विरोध जारी रक्खेआ। डंड रौली दरान गै कुपवाड़ा दे विधायक मीर मोहम्मद फयाज होरें गुलमर्ग च

कथित असभ्य ते अक्षील फैशन शो करोआने खलाफ सख्त कार्रवाई दी मंग कीती कीजे सदस्यें कार्रवाई च विघ्न पानी जारी रक्खेआ, इस करी स्पीकर होरें दौनें मुद्दे पर चर्चा दी मंग गी खारज करी दित्ता।

<><><><><><>

### J&K-Investment

जम्मू-कश्मीर सरकारै अज्ज जानकारी दित्ती ऐ जे 2019 दे बाद केंद्र शासित प्रदेश च 10 ज्हार 516 करोड़ रपे दी रास-पूंजी आई ऐ। आकाशवाणी दे जम्मू संवाददाता नै जानकारी दित्ती ऐ जे अज्ज विधानसभा च इस बारै जानकारी दिंदे होई उद्योग ते बपार मैहकमे दे प्रभारी मंत्री सुरिंद्र चौधरी होरें बुद्दल थमां विधायक जावेद इकबाल चौधरी हुंदे आसेआ पुच्छे गेदे इक सोआलै दा लिखित परता दिंदे होई दस्सेआ जे इस निवेश या 3 ज्हार 407 करोड़ 63 लक्ख रपे कश्मीर घाटी दे 7 ज्हार 108 करोड़ रपे दा निवेश जम्मू प्रांतै च आया ऐ।

<><><><><><>

### Budget-Discussion

जम्मू-कश्मीर विधानसभा च बजट 2025-26 पर जारी आम चर्चा दे दुए ध्याड़े अज्ज विधायकें बजट दे बक्ख-बक्ख पैहलुएं पर अपनी गल्ल रक्खी। चर्चा दी शुरूआत करदे होई सदस्य मीर सैफुल्ला होरें आखेआ जे एहू इक अनोखा बजट ऐ ते एहदे च जम्मू-कश्मीर दे हर खेत्तर गी शामिल कीता गेआ ऐ। जिस्सलै के चर्चा च हिस्सा लैंदे होई प्रो. धारू राम भगत होरें आखेआ जे जम्मू-कश्मीर कृषि प्रधान खेत्तर ऐ, इस करी चेचा ध्यान राई-बाई आहले खेत्तर पर देना लोड़चदा हा। तुआई हसनैन मसूदी होरें मुखमंत्री उमर अब्दुल्ला हुंदा लोकें दी भलाई-बेहतरी उपपर केंद्रित बजट पेश करने लेई आभार प्रगट कीता। इससै चाल्ली इफ्तिकार अहमद होरें बी मुखमंत्री होरें'गी इक ऐसा बजट पेश करने पर धन्नवाद कीता जेदा समाज दे सब्भनें पैहलुएं पर लोहू पांदा ऐ। एहदे अलावा सलमान सागर, युद्धवीर सेठी, वहीद पर्रा, नीजामुद्दीन भट्ट, मुजफ्फर इकबाल खान, हिलाल अकबर लोन ते मेजराज मलिक होरें बी चर्चा च हिस्सा लैता।

<><><><><><>

### LA-Medical Professional

सेहत ते मेडिकल शिक्षा मंत्री सकीना इतू होरें अज्ज विधानसभा च जानकारी दित्ती ऐ जे मैहकमे नै डाक्टरें ते सेहत खेत्तर च पेशेवर लोकें दी भर्ती दी प्रक्रिया च तेजी आंदी ऐ। उनें दस्सेआ जे नवम्बर 2024 च ताले गेदे 365 लोकें गी मेडिकल अफसर दे तौरा पर नियुक्त कीता गेआ ऐ ते इससै चाल्ली होर बी असामिएं गी बी पुर कीता जा'रदा ऐ।

<><><><><><>

### LA-Health Infra

सेहत मंत्री सकीना इतू होरें जम्मू-कश्मीर च मजूदा सेहत ढांचे गी बेहतर ते निगगर बनाने ते कन्नै इस सेक्टर च खाली पेदिएं असामिएं गी पुर करने दे सरकार दे धेइयै गी फही पक्का कीता ऐ। अज्ज विधानसभा च सदन गी जानकारी दिंदे होई मंत्री होरें दस्सेआ जे भारत सरकार दे सेहत ते परिवार कल्याण मंत्रालय आसेआ 2023 च जारी इक रिपोर्ट दे मताबक जम्मू-कश्मीर हर साड्डे त्रै ज्हार दी अबादी पिच्छे इक सेहत इदारा ऐ जिस्सलै कि

मुख्य च एह ओसत यानि राश्ट्रीय सतह पर एह गिनतरी 6 जहार लोकें पिच्छे इक सेहत संस्थान दी ऐ। उनें दस्सेआ जे जम्मू-कश्मीर सरकार अपनी मजूदा सेहत सुविधाएं च होर बेहतरी आहनने लेई उप्परोतली हीले करै करदी ऐ ते हर सतह पर एहदे च सुधार आहनने ते दर्जा बधाने लेई सरकार पूरी चाल्ली बचनबद्ध ऐ।

<><><><><><>

### Free Bus Rider

मुख्यमंत्री उमर अब्दुल्ला हुंदे आसेआ अपने पैहले बजट भाषण च सरकारी ते ई-बसें च महिलाएं लेई मुफ्त जात्तरा आहली घोषणा गी जम्मू-कश्मीर दे बक्ख-बक्ख हिस्सें थमां महिलाएं दी बड़ी सकारात्मक प्रतिक्रिया हासल होआ करदी ऐ। दिल्ली ते पंजाब दे मगरा हून जम्मू-कश्मीर सरकारै बी महिलाएं लेई सरकारी ते ई-बसें च मुफ्त जात्तरा आहली पैहलकदमी शुरू करने दी घोषणा कीती दी ऐ। इस फैसले गी सराहदे होई किश्तवाड़ जिले थमां किश महिलाएं आकाशवाणी समाचार कन्नै अपने विचार सांझे करदे होई आखेआ जे एह इक ऐतिहासिक फैसला ऐ। इनें महिलाएं चा इक सलमा लियाकत नै आखेआ।

<><><><><><>

### Doda Blood Donation

भारतीय सेना दी 10 राश्ट्रीय राइफल्स नै पुलस लाइन डोडा च सेहत मैहकमे दे समर्थन कन्नै इक रक्तदान शिविर दा आयोजन कीता। मैहकमे आसेआ मेडिकल अमला कैप च शामिल होआ ते रक्तदान करने आहलें गी हर जरूरी स्थूलत दी उपलब्धता यकीनी बनाई। एहदे अलावा 17 सैन्यकर्मियों बी कैप दौरान अपना रक्तदान कीता। डोडा दे सेहत मैहकमे नै इस पैहलकदमी लेई फौज दा धन्नवाद कीता। उनें आखेआ जे पहाड़ी जिले डोडा च इयै नेह शिविरें दा बड़ा मता महत्व ऐ। एहदे कन्नै गर्भवति महिलां ते शिड़कें हादसें च जखमी होए दे लोकें दी जान बचाने च बड़ा मददगार साबत होगा। इस मौके पर आकाशवाणी समाचार कन्नै गल्ल करदे होई जीएमसी डोडा च ब्लड बैंक दे इंचार्ज कुलदीप सिंह रकवाल होरें आखेआ।

<><><><><><>

### Poonch Deworming Day

पेट दे कीड़े मारने सरबन्धी राश्ट्रीय ध्याड़े दे मौके पर अज्ज जिला प्रशासन पुंछ आसेआ केई कार्यक्रमें दा सरिस्ता कीता गेआ। एह ध्याड़ा पुंछ दे सब्भनें स्कूलें ते आंगनवाड़ी केंद्रें च मनाया गेआ। मुख्य कार्यक्रम सरकारी मिडल स्कूल आजाद मोहल्ला च आयोजित कीता गेआ जेदे च पुंछ दे डिप्टी कमिशनर विकास कुंडल, चीफ मेडिकल आफिसर डॉ. परवेज, चीफ एजुकेशन आफिसर इफ्तिकार अली शाह ते कई सारे बच्चे हिस्सा लैता। कार्यक्रम दौरान माहिरें ते चीफ मेडिकल अफसर होरें बच्चे गी इस ध्याड़े बारै जागरूक बनाया ते पेट दे कीड़े मारने आहली दवाइयां बी तकसीम कीतियां। इस मौके पर आकाशवाणी समाचार कन्नै गल्ल करदे होई डी.सी पुंछ विकास कुंडल होरें आखेआ।

<><><><><><>

## Santoor-Concert

Arohi संगीत विद्यालय नै भारत सरकार दे विदेश मंत्रालय तैहत सांस्कृतिक सरबंधें बारै भारती परिषद दी खेत्तरीय शाखा जम्मू-कश्मीर ते महिला सरकारी डिग्री कॉलेज गांधी नगर कन्नै रलियै इक क्लासिकल संतूर कंसर्ट दा आयोजन कीता। इस शास्त्रीय संगीत महफिल दा मकसद बच्चें च भारतीय संस्कृति बारै जागरूकता पैदा करना हा। इस आयोजन च संतूर वादन पेश कीता गेआ। जम्मू-कश्मीर थमां डॉ. विथिका टिक्कू जिनें कई पुरस्कार जित्ते न, इस आयोजन च संतूर वादन पेश कीता।

<><><><><><>

## Weather

मौसम विभाग नै अज्जै थमां अगले इक हफ्ते तोहड़ी जम्मू-कश्मीर च मौसम दा सूरते हाल बदलने ते केई थाहें उप्पर बरखा ते बर्फबारी दे असार जताए न। विभाग मूजब, अज्ज ते कल प्रदेश च हौली थमां दरम्याने दर्जे दी बरखा बरने ते उच्चिणं धारें पर बर्फबारी दी मेद ऐ। एह्दे परैन्त औंदी 12 थमां 14 मार्च तगर बी प्रदेश च टामीं-टामीं थाहें पर बरखा त बर्फबारी दे असार न। एह्दे मगरा 15 ते 16 मार्च गी बी हौली बरखा ते बर्फबारी दी पेशगोई कीती गेई ऐ। तोआई जात्तरिणं, सैलानिणं ते ट्रोसपोर्टिं गी सलाहू दिक्ती गेई ऐ जे ओहू ट्रैफिक सरबंधी दिशा-निर्देशें दी पालमा करन ते करसानें गी बी आखेआ गेआ ऐ जे ओहू 18 मार्च तक़र अपने कम्में गी अगड़ा पाई देन।

<><><><><><>